

lis Gnovis

■ ROMANS. Un siôr «Lunari»



Lis Comunitâts di Frate, di Romans e di Viersa a saran compagnadis dutelan dal «Lunari», publicât anje chest an de clape «Scussions», ch'è lavore cence padin par promovî une culture furlane vierte ai popui, in ch'è tiere di cunfin ch'al è il Friûl bande Gurize. Pe cuvierte, il gjornalist Edo Calligaris al à prontât un ritrat dal campion de gjenerositât Elvio Ross «dai Grîs», par 25 agns dean dal grop dai alpins. La «cure» dai 12 mès le à fate, come simpri, Ivaldi Calligaris. «Piçulis rubrichis a doprin la lenga cun clâfs diferentis – al marche Ferruccio Tassin –: storica, meteorologica, sapienziâl, cu la luna ch'è compagna i contadins e la int tal vivi il timp». Tal mieç de cuvierte, la marche dai «Scussions»: une fibule langobarde, cjetade te necropul di Romans distaponade di Calligaris.

■ MANIÀ. Jerbis in taule

E tome a partî la schirie dai apontaments «Natura&Colore» dedicâts dal Ecomuseu des Dolomitis furlanis «Lis Aganis» a lis jerbis dal teritori. La rassegna di convignis eletronicis «Esperti... in erbe» e partissarà ai 13 di Zenâr e po e larà indevant fintremai ai 17 di Març, cun 10 apontaments curâts di 10 esperts sun 10 cuistions diferentis. Il modul par notâsi volte par volte si pues burîlu fûr tal lûc internet dal Ecomuseu (www.ecomuseolisaganis.it), te sezion «Natura&Colore».

■ PASSARIAN. Une zornade pes lenghis locâls

L'Union taliane des «Pro loco», ai 17 di Zenâr, e propon la diesime edizion de «Zornade dal dialet e des lenghis locâls», par stiçâ Comunitâts e istituzions su l'impurtance di protezi cheste forme di patrimoni culturâl. Intal proget, cu lis «Pro loco», a son ingaiadis Amministrazions comunâls, Scuolis, Clapis, Compagnis teatrâls, musiciscj e passionâts di ogni fate.

■ SAN VÎT DAL TILIMENT. Il «benvignût» dai ospedâi

Si slargje la rêt dai ospedâi e dai servizis sanitaris là che i gjenitôrs gnûfs a son sensibilizâts sui vantaçs dal plurilinguism biel tacant de prime infanzie. Il proget «Cressi cun plui lenghis», atif za a San Vît dal Tiliment e a Tisane, al è rivât li dal D. A. I. Materni Infantîl de Aziende sanitarie universitarie Friûl Centrâl, promovût de «Agjenzie regionâl pe lenghe furlane». «Lis gnovis gjenerazions no àn di pierdi i leams cu lis tradizions dal lûc di nassite – al à motivât il diretôr gjenerâl, Denis Caporale – che anzit a àn di conservâ e di puartâ indenant ce che une tiere come il Friûl e pues ufri anje dal pont di viste linguistic». Prime ch'a tornin cjase cul so frutin a pene nassût, i medîs ur consegnin ai gjenitôrs la valisute «Puarte a cjase il furlan», cuntun manûal di conseis su lis oportunitâts pai fruts e pes fameis intal ûs di lenghis diversis.

Miercus 12	S. Modest martar	Domenie 16	Il Domenie vie pal an
Joibe 13	S. Ilari vescul	Lunis 17	S. Antoni abât
Vinars 14	B. Odori di Pordenon	Martars 18	S. Prische martare
Sabide 15	S. Maur abât	Il timp	Frêt e cualchi neveade.



Il soreli
Ai 12 al jeve aes 7.47
e al va a mont aes 16.44.



La lune
Ai 18 Lune plene.

I proverbi
Riscjâ un pôc, par no pierdi dut.

Lis voris dal mès
Tes zornadis di soreli o podês lâ fûr a dà un cuc
e gjavâ vie fueis muartis, jerbatis e claps.

Fâ riviel cuintri de crisi

*In vore la prime
campagne di disubience
civil su la clime*

«**I**l guvier nol sta fasint nuie par difindinus. Rivoltinsi cun azions diretis noviolentis par domandâ l'istituzion di Assembleis dai citadins su la crisi ecologjiche e climatiche». A la barbe dal cidinôr mediatic e politic, «Extinction Rebellion» al à inviât, sul spirâ dal 2021, une grande campagne di disubience civil anje in Italie, cul fin di obleâ i sorestants a frontâ come cu va la sfide mortâl dai mudaments climatics. La proteste noviolente e je stade batiade «Ultima Generazione», pal fat che se no «Salvîn la nestre vite e ch'è des personis che ur volin bon» – a scrivin i partisans di «XR» – la crisi ecologjiche e climatiche, «ch'è je za chentî», nus distirparà, stant che «Lis nestris vilis a son somierzudis des brentanis e i prodots de tiere a son disfats de tampieste e dal sut». I «Ribeis» di «Ultima Generazione», par dôs setemanis, a àn organizât blocs su lis stradis plui impurtantis di Rome, fermant il trafic e cauzion codis lungjis chilometris. L'azion plui scjassose e je stade ch'è a blocât il «Grande Raccordo Anulare», ai 6 di Dicembar, daprûf de jessude di «Settecamini». La polizie stradâl, par dislozâ il bloc, durât passe un'ore, a àn scugnût tirâ sù e puartâ vie un par un i «Ribeis», che po a son stâts fermâts in Cuesture, identificâts, denunziâts e parâts fûr di Rome cun «foglio di via». «Naturâl che i rapuarts cui automobiliscj ch'a subissin lis interuzions a son conturbâts – si lei intun dai documents prontâts dal coordinament de Campagne di disubience civil par informâ la rêt dai colaboradôrs e dai partidants –. Cun dut a chel, no 'nd è stâts gran fats grâfs di violence. Nus displâs pardabon di scu-



I «Ribeis» di «XR» biel ch'a blochin une des grandis stradis di Rome, tal mès di Dicembar

«Extinction Rebellion» al invide a rivoltâsi cuintri de menace ecologjiche

gnî imponiur sacrificis a personis che no àn colpe e ch'a subissin lis nestris azions dome pal fat di passâ par cês in chel puest e in chel moment, ma o cirin di fâju rifleti cun calme e cun compresion sul fat che i sacrificis ch'a scuegnin sopuartâ, in chel moment par colpe nestre, a son pôc e nuie a pet di ce che nus tocjarà a ducj se lis nestris istituzions no comencin a messedâsi par da bon par frontâ la cuistion climatiche e ambientâl. Cualchidun a rivin a capîlu e a pandin la sò solidarietât; altris di lôr a restin dome rabiôs». Prin di tornâ a tacâ cu lis azions diretis, programadis pal mès di Fevrâr, i «Ribeis» di «Ultima Generazione» a son daûr a dedicâ lis primis setemanis dal an a formâ altris partisans, par multiplicâ lis scuadris in vore a Rome, dulà ch'a son za impegnâts anje militants di «Extinction Rebellion» furlans e triestins. Cun di plui, e continue l'azion di

sensibilizazion de opinion publice cun presentazions e convignis «on line» (ogni domenie, a 21 su la plateforme «Zoom»), ma anje di persone, tes zonis là che il moviment noviolent ambientalist al è bielzà implantât (<https://www.facebook.com/assembleecittadine.ora/> - www.ultima-generazione.com). Une lecture ingropade su la crisi e su la mobilitazion de zoventût e je indaûr rivade di Pape Francesc che, tal mes pe «Zornade mondiâl de Pàs» dal prin di Zenâr, al à scrit: «A van preseâts e incoragjits chei tancj zovins ch'a son daûr a impegnâsi par un mont plui just e plui atent a difindi il Creât, metût tes nestris mans par jessi tignût cont. S'impègnin cun malcuetece e cun passion, ma sore il dut cun sens di responsabilitât in face de bisugne streme di corezi direzion».

Mario Zili

ARLeF. Si podarà dâsi in note fintremai ai 28 di Zenâr
Furlan a scuele, la sielte juste

Decidi di aderî al insegnament de lenghe e de culture furlane – sielte che e fâs za passe il 76% des fameis – e je une grande oportunitât pai plui piçui. Une sielte che i gjenitôrs a puedin fâ fin ai 28 di Zenâr dal 2022 sul sit www.istruzione.it o domandant informazions ae segretarie de scuele. L'insegnament de marilenghe, te scuele de infanzie, te primarie e te secondarie di prin grât, al è di almancul 30 oris ad an, cence gjavâ nuie a chês altris materiis. La metodologie didatiche e je ch'è plui efficace e inovative a nivel european: l'insegnament Integrât di Lenghe e Contignût-CLIL. Imparâ la lenghe furlane nol puarte dome vantaçs linguisticis e culturâls, ma al jude anje a imparâ altris materiis, tant che la matematiche. Di fat, daûr di un studi dal Istitut di Svilupp e

Ricerce par l'insegnament de matematiche de Universitât di Dortmund, i fruts plurilingâi (che a fevelin par esempli talian e furlan) a àn plui facilitât tal imparâ la aritmetiche. Doprâ plui lenghis in cjase e la sielte di un percors plurilingâl anje a scuele, a son dôs oportunitâts une vore impurtantis pes gnovis gjenerazions. I vantaçs a son cetancj. Un frut che al studie il furlan, par esempli, al impare miôr anje altris lenghis. Al aumente la capacitât di aprediment e la velocitât di compresion, ma anje la creativitât, l'adatament e il savê vierzisi a chei altris. «Chel furlan al è un patrimoni culturâl unic che o vin di preservâ – al à ricuardât Eros Cisilino, president de Agjenzie regionâl pe lenghe furlane, ARLeF –. Un dai imprescj plui impurtants par fâlu al è propit l'insegnament

de marilenghe ai fruts. A son lôr il nestri futûr e chel de nestre lenghe. Par chest la scuele, e la formazion in gjenerâl, a son un dai argoments centrâls dal «Plan gjenerâl di politiche linguistiche pe lenghe furlane 2021-2025». Dongje di chest, però – e no fermerai mai di dilu – e covente la volontât di ognidun di nô, tes nestris cjasis, cui nestris fis». Daûr des peraulis dal president de Agjenzie, di fat, une volte cjapade la decision di aderî al insegnament dal furlan a scuele, al è une vore impurtant sostignî la trasmissione de lenghe anje in famee, cemût che al ven spiegât te vuide «Cressi cun plui lenghis», realizade de ARLeF pai neogjenitôrs e che si pues disjamâ a gratis sul sit arlef.it. Dentre si cjamin conseis su lis strategiis linguistiche plui justis di doprâ, tant che ch'è clamade «une persone-une lenghe» (cuant che dome un gjenitôr al cognòs il furlan, ogni gjenitôr al fevele cul frut simpri e dome te lenghe che al sa) e ch'è clamade «lenghe de famee» (cuant che ducj i doi gjenitôrs lu cognossin, a fevelin al fi simpri par furlan, doprant il talian dome cuant che al covente).